



责任审校 熊东遨

胡静怡（4首）

中秋宴请进城务工乡邻

掸落两肩尘，参差白发新。
一轮杯底月，捧与故乡人。

读微群诗赋感

休轻琢句是雕虫，一字吟安十载功。
忧患情怀烟火色，寻常笔墨汉唐风。
无题勿效迷蝴蝶，有志何妨学放翁。
莫怪老夫难点赞，或缘直白或朦胧。

小徒羞儿读庄周《秋水》篇得“谁盼将来留骨贵，
欣欣曳尾此涂中”句，余于后批曰“不谙东土三千客，
读破南华一部经”，今补易数言凑为一律

秋风犹未下梧庭，不觅居边叶尚青。
曳尾涂中龟自适，酣眠枝上蚁难醒。
孰闻东土三千客，读破南华一卷经？
殷殷雷声天外响，几人麻木几人听。

购 物

老婆购物忒啰嗦，四处逡巡四处摸。
超市不输王府井，人流胜似浙江波。
扫他台上二维码，扣我卡中三百多。
检点竹篮诸物什，最终忘了买菠萝。

熊治祁（5首）

立夏集陶

居止次城邑，虚室有余闲。
孟夏草木长，晨夕看山川。
山川一何旷，亭亭月将圆。
老夫有所爱，绿酒开芳颜。
衰荣无定在，于我若浮烟。
素襟不可易，白发一已繁。
人生似幻化，放意乐余年。

注：依次集自《止酒》、《归田园居》之一、《读山海经》之一、《乙巳岁三月为建威参军使都经钱溪》、《庚子岁五月中从都还阻风于规林》之二、《戊申岁六月中遇火》、《示周续之祖企谢景夷三郎》、《诸人共游周家墓柏下》、《饮酒》之一、《怨诗楚调示庞主簿邓治中》、《乙巳岁三月为建威参军使都经钱溪》、《岁暮和张常侍》、《归园田居》之四、《咏二疏》。

山中小亭把酒对弈

山光秋色两盈盈，苍壑风来爽籁生。
亭阁傍林三径菊，溪流拂柳几声莺。
棋逢敌手精神旺，酒到肝肠浊气清。
谁道皤翁欢惬意，收枰凝望夕阳明。

访桃江凤凰山天问阁遗址

凄凄风雨问苍天，留得珠玑万古传。
欲觅遗踪何处所，香兰芳芷正芊芊。

凤凰山濒江处有一巨块青石传为屈原垂钓遣愁处

独醒浊世困荒村，坐石垂纶念帝阍。
遥想资江澄澈水，二千年外映诗魂。

秋游道吾山

浏阳城北访名山，七十一峰云外耸。
峭壁悬岩势若翔，苍苔叠翠锁深洞。
黄菊初开石径幽，林壑森森泉自涌。
湖水粼粼衬夕晖，一襟凉意秋风送。
古松偃蹇摩苍穹，禅寺暮云闲不动。
诗心怎得似云闲，归途又把新句诵。

陈书良（4首）

静怡兄、治祁兄、凌兄、仰之兄招饮

四子风流绝代人，邀春剪韭玉卮陈。

可怜树色沉新绿，无复竹林自在身。

志超兄导观窑湾古镇又赐一律纪行乃步其韵答之

江花樯燕色成空，散入唐兴钟鼓雄。

晋代衣冠高士梦，民元书剑侠姝风。

街寮惠我分包子，市井泥他醉简公。

不绝甘棠歌一路，使君笑对夕阳红。

诸友雅集贺拾雨斋诗集出版

欧陆连年战火曛，神州歌舞自纷纭。

谈天野老仍怀旧，溺网郎君坠梦云。

赖有黄縠遮病眼，喜看翠袖振雄文。

池边瘦柳摩挲久，蛙鼓声声怯复欣。

平生首次躬与诗会分得“接”字韵写书生实感也

逶迤画舫入荷塘，鬓影花香交送接。

软李秣温咏絮歌，笺唐诂汉方舒睫。

惊雷骤雨梦初醒，念国思家忧垒叠。
顿失眼前鼓乐船，犹疑月照身邪蝶。

熊东遨（5首）

春夜南园茗话感呈蝠堂沚斋并座上诸公

从游无检束，忧乐一壶收。
道合高人语，名唯饮者留。
好春多在望，非契不同舟。
话到鱼龙寂，疏钟出寺楼。

永子棋院观弈

步上层楼九，风云得近观。
移枰分黑白，落子动波澜。
道出洪荒古，空行宇宙宽。
归来供续悟，星月在天盘。

清内务府御史衙门再谒郑欣淼先生

静住皇宫侧，清如不老泉。
溯源书在手，伴舞竹齐肩。
际会蒙公诺，心期许我圆。
秋盟欣日近，酒备一壶先。

夏日山行即笔

老输筋力兴偏饶，一见青山便折腰。
禽语率真闻即醉，梦痕无序醒都消。
诗嗟去国三闾屈，酒问归田五柳陶。
尤喜晚晴峰在水，临溪坐赏不须招。

暑夜送子金归鄂龚琪归陇如意归浙兼赠黄巍用安公入山韵

中夜筵开第二场，酒坛高抱略夸张。
星辰天上形难觅，烟火人间味不忘。
时局偶参萌故态，孤舟同泛溯流光。
明朝影隔三千里，又为生涯各自忙。

吕可夫（5首）

癸卯立春

误柳芽黄误草葱，谁知又误小桃红。
三年终解东风破，春在野山梅上疯。

多日未出见梅开有作

梅花有约竟不知，粉白胭红空抱枝。
愧对芳卿赔一笑，春风到早我来迟。

山居闻杜宇有作

布谷呼声疾，深山愈觉空。
篱疏鸡懒散，院旷犬西东。
麻将常摸雀，稻秧时患虫。
乡村虽六月，少见蒔田翁。

癸卯元日试笔

东风夜半过窗前，暗把新年换旧年。
有幸七逢春点卯，无非百度梦翻篇。
初心早忘鲲鹏志，穷命难求富贵签。
未卜余生唯寄愿，涓流莫断养衰钱。

长沙天倪庐癸卯雅集分韵得“桃”字

晚春时节熟樱桃，杜宇声中过野桥。
芍药榴花红火吐，篱边陌上赤旗飘。
稻田曾改森森翳，林路何成秃秃凋。
暮楚朝秦一声令，难为寥落绿芭蕉。

张建明（4首）

答嘉明兄招饮并影珠山消暑

蝉嘶添虎气，新绿卷骄阳。
有卧床流汗，无诗字转荒。
君开林下酒，座约月边凉。
意惬清风起，怀冰入梦乡。

重游影珠山夜坐玫晓山庄

把盏临风说快哉，十年而后我重来。
穿林覩面多新竹，踏石留心识老苔。
野雀闲邀添缱绻，山云漫卷起徘徊。
何时酒酌东篱菊，一片清凉不费猜。

答陆兄无锡赠桃

顺丰千里骥，兄遣到长沙。
果带枝间露，情传思外霞。
初尝心浸蜜，细嚼齿生花。
欲谢余难色，词囊未入佳。

过橘洲瞻青年毛公像

暂借洲为舫，湘江小弄潮。
枫颜燃璀璨，雪渚入迢遥。
橘颂凌霜节，云垂振翮雕。
沉浮谁作主，霹雳动重霄。

陈樵哥（5首）

过浏阳梅田湖水库

古港怜初至，澄波作胜游。
有心随一棹，无事狎群鸥。
夭矫鱼龙出，淋漓水墨收。
晚来遥放眼，何日到蓬丘。

梅田湖村观油菜花

城市无佳处，野村看菜花。
不须愁世事，直拟醉烟霞。
路过金黄毯，居安锦绣家。
老农心自足，何用外人夸。

过德昌公园谒段公墓

生年未而立，一死志相违。
受敌军常胜，酬勋姓不微。
烟花循故地，世事论前非。
纵有招魂术，英灵唤不归。

南县稻虾园

爱此园区好，苍苍水四围。
分畦秧稻暖，张网米虾肥。
客到应留饮，春来共倚扉。
开筵花径外，谈笑岂思归。

赞冬奥会滑雪冠军谷爱凌

人生博舞台，万里燕归来。
振翮千回起，灵根几代栽。
大多为汗水，少数是天才。
雪域春风拂，寒花次第开。

罗冈（4首）

感怀兼答旧友网上问讯

黛色霜青喜十围，迂怀每与世情违。
头颅项上欣仍好，面目人前叹已非。
对月吟成愁月堕，迎春酒罢憾春归。
帘栊看雨魂犹断，香抱风枝不浪飞。

和赵焱森会长《戊戌春登天心阁》

斜倚栏杆兴倍豪，巍然一阁绚晴霄。
人叹石径飞红雨，我沐松风听碧涛。
最恸橈枪悲火炽，漫传烽鼓说天骄。
閤亭丝管千秋月，莫负湘流半日潮。

友人赐玉步成二绝兼示金玺刘钢诸贤弟

十载遥招趁晓风，湘云作别遂而东。
雨添春色松江湿，醉白池看绿已浓。

拙句吟成墨沈香，言难尽处意深长。
草堂十载名双陆，莫把他乡作故乡。

石印文（4首）

采风途中远眺羞女山用“羞”字韵

远峰看罢豁吟眸，似物如人各有由。
车迹一弦循古道，山形千载枕清流。
春风着意初繁鬓，树色将心亦掩羞。
行见角巾石处士，凭谁图画记优游。

谒作家莫应丰故居

小园春锁百花浓，想见文峰并世雄。
知命年华成记忆，惊天才笔美从容。
一篇镜鉴将军节，万竹峥嵘国士风。
著述已凭梨枣寿，海鱼山鸟遂初衷。

癸卯四月廿六日感事

樗栎材庸世未捐，缁衣入彀例空前。
十年愧有穷通悟，万里虚饶谤誉传。
鸚鵡赋曾惊北海，鶴鶴枝欲立南天。
至今说项逢人处，尤颂当初祭酒贤。

癸卯六月十七日小河咀村口浩江湖观感

过院熏风觉暑侵，蝉声客思费斟吟。
湖边唱曲初疑醉，柳下横舟半欲沉。
远水波摇台榭静，高楼云拥市廛深。
转看系足鸬鹚队，笑拂华颠慰素心。

周永红（4首）

步袁会长原玉奉和

诗侑吴楚道相通，湘水秦淮擅古风。
欲取洞庭浮大白，韵淘渭北与江东。

由湘入秦航班上拍到家乡

又乘银翼出长沙，俯首舷窗见老家。
五十余年居地仄，回旋自笑井中蛙。

陇头荒山积雪覆云

神离貌合本相亲，俱是丛林水幻身。
各占山头成气候，万方豕狗太无仁。

望城茶亭惜字塔分韵得“水”字

祥云山上听流水，籁响茶亭堪洗耳。
心境澄明一字真，屋场轩豁四俱美。
塔尖木秀耸高天，桥畔石新湮旧轨。
遮莫坑灰冷又燃，不肯尘烟遗片纸。

胡智勇（2首）

题党的二十大胜利召开

隔海烟云一望中，四时晴雨每相同。
民生民志山和水，何去何从西与东。
盛会京华无小事，深秋禹甸有长虹。
丹枫最解国人意，两岸层林遍染红。

与诗友雅聚洋湖拈韵得“楼”

洋湖胜景带琼楼，草色烟波一望收。
把酒无妨金谷宴，敲诗不必富平侯。
春融花信和高韵，霞满云樽洗别愁。
抚案萦怀抒醉眼，钦倾朋侣各风流。

陈永正（3首）

自寿八十韵，咏馨楼主询余生日赋此答之

七十尚逾矩，八十其行休。
百年成孤往，胡为深抱忧。
古云寿则辱，自取庸非尤。
往来顺天命，弗及亦弗留。
况今遘大疫，智愚等波沓。
成坏本无相，奔泽正横流。
我亦一恒沙，此身安足谋。
君子不嗟老，唯嗟道不侔。
天变道亦变，谁能主沉浮。
独悟若履冰，长夜先烛幽。
坐阅两庚子，春梦悲蜉蝣。
吾降兵燹间，避寇滇西陬。
稍长齐大饥，食糟免填沟。
昔儒书能读，千卷堪藏修。
绮句耽伐肝，琅玕怯还投。
小山词同诵，有美欲摹倣。
七年置怀里，微芳散衾裯。
赴渊知非世，思与子同舟。
舞鸾将别鹤，晞发水中洲。

终焉弃予去，蜷局怅夷犹。
海涯隔蜃雾，苹花误自由。
浩劫因谁造，起蛰快恩仇。
两雄逐巨鹿，大纛麾貔貅。
伐罪凭漂杵，猛者提鬪髅。
昆冈已俱焚，文物恣狂搜。
岌岌南冠者，累累请室囚。
长街叱拥篲，挥鞭驱鬼牛。
列队聆宝训，跣足操耘耰。
崇卑定九等，骈首供践蹂。
一朝朝市喧，飞报诛欢兜。
戴盆见天日，失喜酌盈瓿。
十载浹肌髓，兹痛弥千秋。
踽踽赴上庠，鉴史识薰莸。
禹穴秘未探，竟厕学者俦。
分当注虫鱼，丹铅事校讎。
大惑终不解，师道惭尼丘。
稍欣五六子，咏沂临清流。
但期致升平，岁月从优悠。
呜呼天何道，循环运再周。
岂意有此日，风雷掀九州。
太学聚十万，各献远大猷。

少阳推李种，六贼计咸刘。
劫棋争黑白，惊雹乱枰楸。
断魄不可复，巨创应难瘳。
未凝斑斑碧，已闻歌且讴。
群蚩竞乘势，各执长短筹。
弄潮互低昂，东方居上头。
大物取者谁，举鼎轻若钩。
几人腴曾绝，滴血征王侯。
天地终得一，万品皆赘疣。
朽质始病蠹，啄木安苟媮。
国香任零悴，鲛珠一网收。
煌煌封禅文，登岱小寰球。
北窗羲皇卧，端宜号无愁。
我亦陷世网，鲁叹杂楚咻。
侧席伤衰懦，守默防口訕。
前贤贵三立，璞玉慎斫馊。
无端以书鸣，握管恒包羞。
幸未倚市门，问金效俳优。
所哀日芜秽，田稚滋多蠹。
羿彀消息传，逢蒙矢频抽。
侪辈随朱轮，罄折尊督邮。
张罗更噬犬，新冠甘沐猴。

迹来赖葺，毋用听鞲辘。
傲傲醉犹舞，剩欲废双眸。
昏灯共言笑，初心忆同裘。
涸辙留命共，谷深隐潜虬。
南岭花几枝，雨打仍风揉。
逢春二三月，开落空嗟讴。
左右殊贵贱，各唤晴雨鸠。
暇日偶相聚，论辩气益遒。
逍遥在万里，莫肯狎驯鸥。
余生做个人，素愿敢望酬。
有待不我待，脱去匪外求。
观心淪苦茗，邀月临高楼。
盈手谁可赠，清辉如水柔。
探怀出片纸，聊以致绸缪。
我诗不须笺，笺者徒啣嚅。
我诗不堪吟，一吟梗君喉。
冯子明吾意，还能寿吾不。

端 午

此中无泪吊诗人，枯坐能安失望身。
闭目观书如水过，一时流尽少年春。

有客拍得某公仿倪迂小笔属题

南浦波光连太液，西泠心事托云林。
谁怜绝代文章手，池上犹摇万柳金。

孔祥庚（3首）

成都凤凰山体育公园

凤巢丽影白云游，众鸟来朝花醉眸。
蓉火频传征战急，一时胜败此中收。

过北盘江大桥

昔时摆渡动哀猿，绝壁空悬白浪翻。
万里云南虹气贯，轻车高铁若星奔。

杜甫故里巩义

文山字水亦雄哉，笔架瑶湾拜圣台。
茅屋悲风终止息，芳春喜雨始归来。
碑前久伫新儒侣，苑内犹存老凤胎。
诗满仁情家国虑，后人千载叹微才。

周达（4首）

瞻仰韶山伟人故居

洞庭云气自成龙，占尽风流是此峰。
临水应闻尧女瑟，跨江曾击秣陵钟。
沉浮人海终归向，老大生涯愧远从。
望里湖湘依旧好，杜鹃红遍小山冲。

闲居

林烟漫绕赋闲身，高捧山居半出尘。
歧路廿年分手泪，宦游一个折腰人。
老归犹忆江湖月，花落知怜草木春。
所幸岭南风物好，白云深处养天真。

步东遨兄夏日山行即笔韵

毕竟青春未肯饶，登临只可到山腰。
曾观齐鲁层云动，思坐敬亭炎气消。
天意于今终了了，人生何处不陶陶。
拾阶欲作桃源觅，飞鸟晚归相与招。

立夏日芙蓉嶂小聚步放翁初夏韵

春风已老凯风初，相聚山中酒共呼。
活火烹茶消散漫，壶冰贮月得清娱。
心安每爱酥娘曲，梦觉常寻卓氏垆。
满眼新鲜花雨洗，经年疫疠一时苏。

周燕婷（5首）

虎门海战博物馆

火凤丛丛列祭坛，临风洒泪恁无端。
百年行迹匆匆过，一馆图文仔细看。

过朝云墓

想象濒湖立晚风，清怀不与俗人同。
古来多少喧嚣者，都似流星过夜空。

夜宿襄阳古城

金波浩渺岸如浮，睹面风凉乍觉秋。
冷淡烟中荷影瘦，晶莹露下菊香柔。
蝶怀何愿频窥梦，人有所思空倚楼。
长夜商声听已惯，一星如月正当头。

北上车中作

闻道灵山集百祥，正宜佳会趁重阳。
流光过眼依稀似，秋色随车渐次黄。
自有峰峦供俯仰，漫凭人事说炎凉。
长驱小试登临意，一笛悠然破混茫。

过都峽山玻璃桥步东坡赠邵道士韵

百丈悬桥置一身，依稀便与鹤仙邻。
云光到眼添佳气，泉水穿崖见本真。
差喜未留遗憾事，等闲都是过来人。
东坡去后江山寂，潮落潮生有夙因。

巴晓芳（4首）

古江梅

世居僻野饮山泉，移入名园且自妍。
尽别腹心酬厚土，唯存筋骨向高天。
香融明月清风里，蕊绽飞霜舞雪前。
已惯孤芳人未赏，还携松竹数华年。

再访问津书院

何事年来频问津，只缘老眼障灰尘。
分明大道疑荒径，却认无盐是美人。
木铎渐疏声已远，浮槎未泛梦难真。
庙堂再叩孔夫子，此去前程路可新？

刘关张结义塑像

乱世知交自不凡，艰辛已共未同甘。
曹孙并峙难争胜，龙凤双持却半耽。
大意失荆伤左右，空言复汉困西南。
君臣岂得如兄弟，结义桃园只美谈。

故乡乌桕

亭亭绿荫伴春秋，背倚田畦面水流。
岁末扬竿敲白籽，午间系树歇黄牛。
一星豆火照书屋，半簋残枝入灶头。
老大慢吟红叶赋，怕提红叶惹乡愁。

蒋金明（5首）

咏竹（五首）

倜傥琅玕气色妍，若含风雨若含烟。
非关笔下青松子，昨梦依稀到渭川。

风起茫然四望惊，时闻折竹一声声。
问篙访戴今知否，玉骨冰心照月明。

案头挥洒枕边思，月影南轩擢秀姿。
无竹不居逾半世，斑痕一点两相知。

笋肉香餐几度闻，绿卿高拂入晴云。
岁寒雪暗谁人识，岂独徽之爱此君。

鸣凤空山雪竹残，日高醉起倚阑干。
莫愁天下知音少，再拜东坡屈指看。

裴涛（5首）

出差京中大雨有记

倦客重来认海桑，半生如梦又何妨？
满天风雨洗难尽，陌上尘和鬓上霜。

无 题

端午年年读楚辞，辞中忧愤更谁知？
如今都作承平颂，既费民心又费诗。

过荷塘

一世菩提再世莲，人间住久忘从前。
来生愿做云和水，流过无忧万里天。

此日（二首）

风展红旗卷国殇，晨晖当日白如霜。
腥尘吹上行人鬓，草色年年绿断肠。

此日惊雷动玉关，飘摇风雨旧河山。
招魂谁赋门前水，三十年中去未还。

郭庆华（5首）

遥贺迦陵先生百岁华诞

马蹄湖畔养天真，陪伴清莲百岁身。
细嚼诗词心不死，广栽桃李景长春。
歌吟端似迦陵鸟，风雅岂输唐宋人。
久欲趋从惭未及，倚楼遥望仰星辰。

步雪师长夏忆故人韵

一从倾盖得真言，如盼甘霖每望天。
把酒曾邀唐宋月，遣怀长向舜尧年。
小梅窗下灯传久，忆雪堂中座抢先。
夏日榴花开似火，诗情被点又重燃。

秦淮河即兴

金陵往事岂如烟，宿草新花岁月连。
客度唐音鱼埠外，柳摇灯影酒垆边。
六朝燕逐乌衣巷，只手谁撑赤县天。
王气而今收尽否，清波漫送去来船。

题红叶图（二首）

冷艳高标不染尘，枝头秋晚更谁亲。
深情只待飞霜到，仰面随他点绛唇。

秋深不肯露衰容，俏立寒枝对北风。
敢借清霜施粉黛，妆成抵死比花红。

徐退之（5首）

五台

是处山俱好，方便率意游。
云生天北极，日出海东头。
草木茫茫绿，滹沱滚滚流。
五台无所谓，不用问春秋。

戊戌霜月鸡足山虚云寺饯别惟升和尚

万念同鸡肋，三生信马蹄。
风传花落溷，雨洗絮粘泥。
后案非新案，前题亦旧题。
且为无用用，聊以不齐齐。

重五（二首）

底事扁舟又发吴，九歌九辩复何如。
一身万事齐桑海，如醒如醉拾句初。

端午又随风去了，众醒我醉两茫茫。
婵娟不识离骚短，偏照诗人一夜长。

南京入梅

淮水钟山晚自澄，金陵草树碧相仍。
黄梅时节多风雨，不信龙蛇不折腾。

叶子金（5首）

早春过花明楼景区

东风吹暖故人家，尚有微寒欺嫩芽。
仗得老梅真气在，一声呼出满园花。

退休拾趣

移盆换土植春光，七尺阳台画意长。
一串紫藤爬过界，邻家小宅也添香。

壬寅正月初七暴雪

一岁光阴一夜封，琼花莽莽蔽苍穹。
枯山披起银盔甲，古井堆平黑窟窿。
会向豪门镶玉毯，也教寒舍着鹅绒。
昊天恩泽书难尽，刷白人间第一功。

宁乡千佛洞

小风柔桨过岩扉，幽谷迷宫现紫微。
石幔徐徐开化境，神钟朗朗立天威。
三生执念于斯了，万载禅光破壁飞。
尤喜暗河封不住，一声佛号出重围。

咏深南路拓荒牛雕塑兼纪鹏城两万基建工程兵退役官兵

渔村列阵把犁操，三十余年未跳槽。
执念无输精卫鸟，藏锋不逊越王刀。
难从大市挣微利，信有嘉禾作锦袍。
更喜犍牛新挂轭，南溟再起万重涛。

杨宗义（5首）

癸卯春望

城上春云厚，斋中短榻安。
正宜坐书卷，不用整衣冠。
梁燕泥巢在，江鸿旅思宽。
门前花几树，每作故人看。

过夜市

霓虹满地逸天星，人笑人呼耳未宁。
却忆去年过夜市，烟尘歌舞两飘零。

赠竹影东渡

湘水秦关又一年，蓬瀛深处是春烟。
清留竹影依栖地，香递樱华自在天。
故梦扰人终有尽，明灯照海正无边。
空闻楚些风尘客，不见星槎亦可怜。

天问诗社成立四十周年寄桃花江道友

放棹桃花水，行歌天问台。
群峰青不断，万壑响俱来。

高遁接輿径，张扬太白杯。
一言三百意，舍此更何哉。

题严君柏洪溪山烟雨图

洞口几时路，仙源随处山。
方将烟雨合，真爱水云闲。
支遁或曾买，谢公应未攀。
人间有大壑，不碍小舟还。

李意坚（5首）

将发江西

吴头楚尾路三千，不在云边即水边。
此去闲心江右遣，晴看瀑布雨看烟。

过金刚镇

溪水潺湲近野家，夏初犹见两三花。
旋来未拟乡间宿，失听池塘一部蛙。

过曾文正墓

青山朝拱寺为邻，一冢相埋毁誉臣。
数子同参尘事外，熏风四月尚宜人。

访桐溪寺

好怀相趁出长沙，停履山隅叩梵家。
随喜漫从莲座过，一庭岑寂灿榴花。

新正野望

负手城南立旧丘，不风不雨小勾留。
莱荒野旷寒林渺，尽入凭临一寸眸。

曹初阳（5首）

五月初九夜宿南天门看泰山日出遇雨

玉皇顶上待良辰，骤雨浇头洗一轮。
料是东君怜本色，不为骚客镀金身。

洪水河大峡谷观瀑

自谓声威出顶巅，一流飞泻九重天。
凌空纵有超凡势，跌落悬崖也是烟。

徂徕山寻太白遗迹遇雨

寻幽冲雨脚，附和野禽多。
匝地球敲鼓，浮烟黑似锅。

仙踪时隐约，峰影自嵯峨。
山路龙蛇走，青苔奈我何。

大足宝顶山石刻

宝顶擎天气不凡，披霞九转扣仙岩。
汉家故事云边隐，西域农桑壁上嵌。
谁解满山儒释道，自怜半世苦酸咸。
林苔似解游人意，分染春痕上薄衫。

登鸣沙山

悬梯百丈我来量，肩比峰高五尺长。
满目山书金世界，一天云写玉文章。
沙声元自无今古，秋色何曾管盛亡。
隐隐驼铃传岭外，今宵谁梦汉时光。

蒋昌典（4首）

虎跳峡

举首千寻壁，低头万壑雷。
休轻柔弱水，一怒劈山开。

石燕湖闻钟

环山抱合绿侵衣，一片琉璃映翠微。
何处林深藏古寺，但闻清磬逐云飞。

石首东岳寺

烟波浮秀岳，岭树正苍苍。
寺踞五云顶，江回九曲肠。
此心元自在，天道本无常。
俯仰随尘世，沉浮两不妨。

夜登杜甫江阁

敛襟轻步上，浩浩对江风。
广厦万间处，霓虹十色中。
重来非旧燕，逝去是孤篷。
夜醉长沙酒，予怀略与同。

袁立中（5首）

登泰山

绝顶云浮阔，身披四翠围。
倚栏嘘气促，捧腹怨腰肥。

石级人稀少，峰梯路渐危。
阴晴俱在眼，不必问天机。

登埃菲尔铁塔

凭高天可触，视远景无边。
广厦居身下，飞云在眼前。
句从寒处得，月向梦中圆。
尽说西洋好，归来剩此篇。

雅鲁藏布江大峡谷

汉藏千秋史，今朝放眼看。
涛声穿峡谷，云气湿荒峦。
家国河图广，祥和鸟兽安。
我来参福地，喜得一身闲。

春日杂吟（二首）

碧柳清波一色裁，护堤花是去年开。
东风脚步行虽缓，也把春光带过来。

雨后天新绿满池，黄鹂清唱小丫枝。
留声碧水难成韵，不语青山似有诗。

罗永珩（5首）

过海沧湖

急趁晨光碧水滨，抛竿不惜一排匀。
江湖久苦风波恶，何事人间下钓频。

行空中步道

偶然跳脱世尘中，步履闲闲入碧空。
足底湖山肩畔树，万花枝上驭春风。

回乡偶书

少年行迹复寻游，山自葱茏水自柔。
老大归来浑是客，一花一草寄清愁。

钱江源

幽涧盈盈一勺泉，清流石上细涓涓。
如何润黠千重翠，更化江潮浪拍天。

开福寺白莲

素萼娉婷傍佛门，淤泥深处扎灵根。
池头纵使多风雨，自蕴清芬待月痕。

郑雪峰（5首）

志愿军四百三十七具遗骸由韩国返葬沈阳

抗美援朝烈士陵园

赳赳雄唱气冲霄，当日风旗过大桥。
长策极矜人海战，飞鏢惊见阵云焦。
归余残骨何由辨，散久英魂未易招。
青史茫茫纷惑在，侧身东望怅难消。

庐山

柏色松声惨不骄，雷霆当日下青霄。
庐山真面还休问，满壑烟岚涨未消。

雨花台烈士陵园

大道之行天下公，奋然投袂有初衷。
横刀洒血花飞雨，带镣哦诗气若虹。
来向纱笼认遗墨，至今磷火在深丛。
只应莫问沧桑后，旧义江东同不同。

与鸣遐雨如宿四祖寺

上香人去后，小衲闭珠林。

院静孤松影，檐交宿鸟音。
闻钟知夜定，因病悟禅深。
更听联床雨，从论物外心。

疫情后与杨中良三亚观海

鸾背高寒万里来，双襟伫向海天开。
东隅曙日礁前出，南国椰风沙岸回。
况有故人堪把臂，初经尘劫此登台。
澄波浩渺心无极，且试玄虚作赋才。

陆奇捷（4首）

南 阳

榆叶绿，麦穗黄，连日不晴雨浪浪。
天公作意故无常，噤尔翻覆众为忙。
挽衣戴笠空张皇，农机未至不得将。
农机不许下南阳，高速道口久相羊。
群吏见人如饥狼，量尔之宽丈尔长。
巨细靡遗各条章，三年公府欠口粮。
麦芽出，田夫哭，明年莫种麦与粟。
盍学长安浮荡子，不事产业食有肉。

隔 世

隔世犹教吊未能，长街此日又如蒸。
向周防处成追念，于死亡时已永恒。
湖海冥冥朋辈老，机轮叠叠祸灾仍。
两行乔木无情碧，一霎参差恐不胜。

口号（二首）

又报神舟过玉津，祥鸾杂遝彩云新。
飞天逐梦听尔辈，尚有人间无梦人。

惆怅江湖白发深，长街只有鬼如喑。
海榴一树红于火，证我年年不死心。

陈海洋（5首）

感 遇

一点消息去，一点消息无。
宵深悬明月，泠泠天宇孤。
苍山自郁郁，兰熏发偏隅。
风吹香自散，流华满明湖。
素叶清何极，晶莹挂露珠。
清圆不可触，对视见真吾。

忽生惶恐意，往昔渐模糊。
相逢原无意，别后路更殊。
碧涧沁石骨，寂寂任心枯。
晓梦终成别，浮生绝欢愉。
峻岭苦寒甚，孤清生一株。
乳萼春风里，幽幽倩谁扶。

过翠湖见旧岁枯荷

骨立残枝似不禁，樱花渐谢柳成荫。
淤泥水底积三丈，中有青莲未死心。

太华寺观梅

偶随松径谒空王，白月穿云梵语藏。
素萼闲华钟磬息，梅香隐隐敌檀香。

看老家院子监控（二首）

别后天涯底事忙，椿萱小院隔屏望。
一春烟雨双眸湿，去岁木香红上墙。

客来闲坐一壶茶，墙上木香随意爬。
院外行人问花事，春风送语到天涯。

张庆辉（5首）

入山寻得野营地

穿峡投林陟远冈，为寻秋草一坪黄。
几时行帐安于此，来舀山溪白月光。

过建水双龙桥

霜蹄踏石溅星过，兵燹年深终不磨。
十七孔圆如巨眼，等闲朝暮看风波。

入西郊玉案山过妙高寺

一天青似洗，野望淡浮烟。
小寺大城侧，夕阳寒草边。
松萧如立叟，径古不知年。
应是在山好，妇姑来取泉。

记梦

青瓦旧簧舍，四围皆陌阡。
分明听雨夕，恍惚课书年。
有桂馨秋节，偕谁坐晚烟。
故吾侵晓别，兀坐抚华颠。

鸡足山虚云禅寺古梅盛放怀惟升方丈

忆嗅寒香古寺前，风中几瓣落吾肩。
霜天斋磬空庭度，客梦山窗冷月悬。
松下逢僧晨扫雪，梅边听法午烹泉。
别来世外今何若，佛影青灯隔晚烟。

蒋磊明（5首）

夏至日感事

庄蝴泡影旧曾谙，一岁绸缪复笑谈。
舐痔得车宁有种，求鱼弹铗果多惭。
狙公朝暮重无益，叔夜情怀七不堪。
莫道天涯催短景，看他黄道又图南。

小满日过梓里文兴塔

古塔额文兴，梯云不可登。
戟天如铜影，傲世以觚棱。
雨润疑留客，溪清胜得朋。
物情皆小满，何事恋春冰。

众社成立诗以贺之

搜辑縹緲固所歆，猎奇载酒亦时需。
高朋但有西园集，老子还吹南郭竽。
五二零无多缱绻，三千界有最膏腴。
跻身圣代从从社，谁约湘乡共一壶。

江湖久不见苗家膏药偶得藏药二饼

以倾城昨日诗韵询昨夜兄

羊湖桂魄接云根，云上曾留捣药痕。
玉兔拓来狗皮帖，青蚨换出远人村。
拟将雪域经方饼，小叩苗疆大法门。
万籁赖卿糊与裱，春时一例诵洪恩。

东渡诗社冷子瑜兄携稚子过星城于井塘燕集席上

分赠福鼎白茶

杯酒偕忘二月寒，井塘犹似武陵滩。
人间软肋将携乐，江右才人相见欢。
挂席日东扬子渡，分茶天上水晶盘。
无论魏晋些些事，醉把梅桃一例看。

刘湘（5首）

麓湖

玉鉴遗林麓，含滋结昼阴。
岸芜舒叶早，烟树着花深。
漾影浮青鸟，流光动翠岑。
一湖平似掌，捧出白云心。

春分

捎得山光入，平桥落影斜。
离离河畔草，采采路边花。
还向篷门映，不容华屋遮。
春风随日脚，迤迤走天涯。

落花

世缘身计各沉浮，谁为情深肯暂留。
多少花开成过客，只挥粉泪不回头。

除夕还乡有寄

岭路盘盘城廓稀，轻车飞度出重围。
行程七百同风雨，触绪三千别是非。

蝴蝶梦还仍似客，杜鹃声唤不如归。
今宵欲诉一年事，小火红炉入细微。

元旦翌日旧友问讯后作

自哂终成貉一丘，风尘出处忆前修。
梦中有梦休惊破，诗外无诗未入流。
蹇况凭谁怀楚玉，临歧只手拂吴钩。
当时踽步湘江畔，雨打梅花雪满头。

江岚（3首）

岁暮过张家界

久慕张家界，迟来伤二毛。
峰林乍相对，尘累顿时抛。
真乃山之国，恍如神所巢。
何期并肩立，高矗在云霄。

辛丑冬日访酆道元故居

大疫无人过，严冬独我来。
庭前苦召唤，门口且徘徊。
才大号文伯，性刚成祸胎。
猿啼三峡月，终古有余哀。

咏张家界峰林

猴王兵器不称手，直下龙宫访老友。
刀枪剑戟都嫌轻，转身推波便欲走。
羞杀教广急止步：尚有宝物请回顾！
喜得如意金箍棒，且保唐僧踏长路。
取经事了也成佛，神铁无用久摩挲。
何期深藏在此地，化作石峰如许多！
云遮雾罩不知年，翠锁苍盘望似烟。
猴子猴孙巡逻处，虎豹狼虫莫敢前。
世界依然不太平，大圣安得享清闲？
唯恐一朝又拔起，顿时万山崩摧巨浪复滔天。

杨帆（5首）

明城墙赏花

三月飞花故垒边，游人快意得春先。
萧然不语残垣在，早识荣枯五百年。

崖山海战遗址公园读碑得句

崖山海战早成空，兴替文章意未穷。
代有新碑添旧碣，一江又送六朝东。

登天坛祈年殿遥想百年前中国推翻帝制

第一部宪法在此草成

风烟舒四望，城阙自方圆。
造化堪存道，登临且问天。
百年休帝祚，一纸试民权。
兴废成时序，而今第几篇。

谒荆州张居正墓园

半园瑟瑟半园清，草径苔碑首辅莹。
可叹十年心力尽，难扶一代帝庭倾。
魂惊卫子支离骨，色逊荆公朴厚名。
谁解维新常寂寞，忽闻暮鼓两三声。

登戒台寺后山

寺旁曲径入鸿蒙，峰在西边城在东。
峰浪奔来千百叠，城形遁去两三丛。
诚知岩壑同今古，还悟尘纷是色空。
暮鼓声中山月小，归途远指几灯红。

吴晓晖（5首）

访光严禅院过洗心池

深山古寺路难寻，满耳风声尽佛音。
但得此生存正念，无须到此洗尘心。

次韵贺由哥《岁月由心》付梓

积久未闻仙籁音，青丝半被雪霜侵。
不求名字传千古，肯为诗书掷万金。
邀月由心君幸酒，乐天知命我微吟。
才同野老争蒲席，又倚阑干侧抱琴。

遣怀

从来世事总违心，颠沛江湖少顾临。
惯识人情多不古，难知天意亦如今。
半生虚度鲲鹏死，两鬓渐稀霜雪侵。
老去幽怀常健忘，冷弦未拂已沉吟。

寄一尘兄

放歌当纵酒，醉后各还家。
云送飞鸿远，山催落日斜。

乡思萦锦水，归梦觉长沙。
莫叹冯唐老，青春尚可賒。

南京怀古

莫歌建业楼亭好，卅万屠城犹自哀。
无限感伤春去了，半江风月我归来。
喧嚣王谢乌衣巷，寂寞孙吴白马台。
兴废何干商女事，令人长忆仲谋才。

姚泉名（5首）

谒平江杜拾遗墓

汨罗江外日初曛，万古丘原野老坟。
樟柏荫浓鸣鸟暗，祠堂春早落花勤。
洞庭秋雨千行泪，世路扁舟一片云。
身后荣名莫怜晚，人间毕竟重斯文。

游张家界

一入张家界，群山就变疯。
束腰羞楚女，列阵愧秦公。
猴学孙行者，人皆陆放翁。
红尘太严肃，不似索溪中。

过一粒寺

闭门孤寺菜花间，衲缀僧衣挂殿栏。
沧海多情存一粒，是沙是泪是垂涎？

夜宿琵琶湖即景

三号楼前灯影新，水边栀子晚香匀。
我将归卧浮鱼动，惊碎湖湾月一轮。

代桃苞答

粒粒花苞似弹丸，莫言桃李怯阴寒。
一朝待得东君令，炸个春天给你看。

黄小甜（3首）

十万大山石头河

啸吟碧野任风流，雪溅珠飞竞自由。
石涧横斜万张稿，从心所欲地天留。

甲午嘉平既望立春前夕玉泉诗院小集用东坡韵

逸兴倾樽落照前，楼台风雅话新年。
东皇吩咐春方启，骚客聪明句已妍。

借得苏诗随择韵，醉吟花月不须钱。
朦胧浮浊笼清夜，似有高人钓碧天。

咏 梅

寻梅信步入农家，驿外断桥雪又加。
底事冰封梅始艳，只缘雪滤地无瑕。
冷香浮动清心肺，疏影轻摇接月牙。
千里之行欣有悟，何须热土竞奢华。

陈少平（5首）

亚洲杯女足夺魁

方羞男足屡丢盔，忽喜红装夺冠回。
一旦阳衰钻地去，初春月好烛天来。
降龙木破天门阵，栖凤桐飞旷世才。
此日论功应大赏，凌烟阁置玉妆台。

祝贺神舟十五号发射成功暨太空会师

又向空天掷一梭，神舟惊艳入云罗。
三舱对接庭园阔，六杰相逢碗筷多。
鼓瑟吹箫惊玉帝，锄云耕月引银河。
从今落户青冥上，重唱当年击壤歌。

兔年咏兔

律复新元万象更，又逢玉兔荡春旌。
拔毛曾与千家写，避险何须三窟营。
让彼夺魁龟窃喜，为人捣药疫消声。
从兹跳脱无羁束，迺水遐山任我行。

过小澳并登望海台

水蓝沙白锁晴烟，极目沧溟一岛悬。
渔子有家皆浩瀚，诗人无路亦颠连。
小舢板聚海中海，大石台望天外天。
又见妈宫岬岸渚，有风波处有慈船。

中秋夜赏月即兴

又沾凉意过中秋，拜月阳台赏月悠。
古镜不曾缘日损，飞船已是信天游。
重霄环玦终同运，一水风波尚未休。
请看轩辕丘上月，清辉总照海东头。

陈逸云（4首）

儿童节上班路上口占

朝逐人潮出，暮随车水归。
楼林各安穴，日脚偶分辉。
一网交游阔，四邻相识稀。
他年儿忆旧，况味恐全非。

赴京途中寄二三子

久困江南翼未舒，一朝北去极欣愉。
野无静树叶频落，天有来鸿道不孤。
且在人前遮半面，待同酒后放形躯。
平生难得糊涂醉，况值风云世变殊。

培风兄将之日本访学次原韵以寄

东海烽尘事已非，三千水击遽睽违。
新登瀛岛一衫白，回望齐烟九点微。
啖尽荔丹终别去，赏残樱蕊可来归。
闲庭滹茗偶抬眼，复见浮云似子衣。

赴苏州火车上

楼影幢幢灯火疏，残宵唯剩铁龙驱。
轴轳声入千家梦，寂寞人征万里途。
轨上流光飞箭漏，斗间射紫近勾吴。
飘蓬为有云端志，不是闲游向五湖。

冯倾城（4首）

种得兰花初开

细意勤调护，幽兰报我开。
素心真玉洁，芳息是香来。
王者怀先圣，骚人仰楚才。
新阳欣早到，悄悄上高台。

种得兰花又开

尽注心头爱，幽兰喜复开。
相期蜂未至，却见蝶飞来。
静坐香弥逸，凝思觉有才。
千丝待裁剪，好句闪灵台。

青藏铁路通车感赋

绝域通天路，荒原万里云。
烈阳常灼灼，大雪每纷纷。
野旷人何罕，天高雁不群。
从今连一脉，藏汉再难分。

缅怀诗圣杜甫

干戈烽起难当头，挈妇将雏不尽愁。
落魄江湖身渐老，致君尧舜愿难酬。
已钦诗律群公问，最感心怀赤子忧。
茅屋秋风思广厦，流芳更在万千秋。

马翠（3首）

中秋对月

不负屏前约，花边共酒边。
清辉明笑靥，新句落云笺。
看尽烟霞色，携回翰墨缘。
鬓云浮动处，人月两婵娟。

康定跑马山上

曲曲禽弦晓色新，风吹花海散香尘。
眼前踪影须臾没，疑是南华梦里人。

宅 家

那堪闭户坐寒厅，日日窗前盼柳青。
忽见眼前莺蝶闹，桃花十里在银屏。

张小红（5首）

别 意

街灯撕夜幕，白雪覆窗台。
为有离情满，频添酒一杯。

思 儿

痴雨连三月，乡愁涨似溪。
黄昏逢学子，恰与我儿齐。

人在高原

萍身漂藏北，五载五搬家。
幸福离多远，天涯与海涯。

河边见槐花有感

傍叶穿花踏夕阳，沁人滋味忽前方。
抬头串串玲珑玉，闻得槐香忆故乡。

看 雪

已惯高原岂惧寒，潇潇暮雪独凭阑。
琉璃世界知真我，一样心肠不必瞒。

周锦飞（5首）

范仲淹

寒门一举举朝倾，塞外江南满盛名。
武镇羌戎长策稳，文兴庙学硕才盈。
以忧以乐顾先后，佐道佐君谳重轻。
不朽有三垂士则，犹持万笏拱天平。

王安石

文章经术别开炉，不近人情德便孤。
窥孟训承民本贵，变天拗到彗光枯。
平生自许同伊吕，终古难逾是法儒。
千载梅花香尚在，钟山明月照殊途。

苏 轼

谪向凡间若许春，峨眉秀色此生尘。
一门三杰群飞雁，两党无津独立人。
笔下风涛犹纵酒，眼中青白已还淳。
平生功业常州歇，为赋河豚欲上频。

李清照

清丽端庄别一家，含英漱玉气辉华。
纵横论史当深戒，俯仰摩碑只谩嗟。
最痛中流潮信改，谁怜晚境世情赊。
黄花检点新来瘦，扶醉冲寒对暮鸦。

东渡寺樱花

朝聆啼鸟晚江风，古寺樱花寂寞红。
只合身闲多曼妙，不争春减自玲珑。
层林半掩香犹暖，宝殿微光色已空。
月满蓬山梦难得，垂垂低首海天东。

方伟（4首）

兰亭梅花

别时红颗满枝丫，影入清池艳比霞。
日日信风催嫁汝，归来还剩几株花。

赴光山

恨山远望列如仪，柳姐桃姑舞彩旗。
此是今春初入境，沿途箫管向人吹。

车宿故乡

儿时乡路自徘徊，灯影星光向野开。
夜景拍成犹有憾，蛙声未入镜头来。

过文天祥祠

走街穿巷欲何之？来访东城丞相祠。
小院犹存当日树，白墙多挂后人诗。
狂澜既倒诚难挽，臣节如磐终不移。
遥想吾家方正学，一般肝胆可相师。

杨云（5首）

又见桂花开

秋心剪碎梦纷披，月殿瑶华影自移。
最是浓香无着处，一天风露晚凉时。

阳台月季花

老枝看久易忘言，可惜清香集一轩。
多病人间花有感，今春不似去春繁。

雨 中

一伞回旋雨脚并，寒云散处晚风轻。
无端生出小欢喜，许看明朝春水生。

怀故园

久在天涯处，巴山忆到稀。
泥途惭客鬓，风雨负鱼矶。
竹外寒啼缺，云边旧浣衣。
可能留老眼，一岭息尘机。

百工堰小坐忽思去秋曾与父母同游此地

重来云水地，再对桂花天。
欲折何堪把，相思况隔年。
谁争如负米，我近愧谈玄。
岂有风尘慰，乡关路几千。

韦散木（4首）

论诗二首北京语言大学课后

我谓得佳句，譬如发横财。
取之更无道，非天纵何来？
天道不患寡，难筑金银台。
寤寐无再得，冥搜极心哀。

我谓诗有法，初领门童进。
循循善诱之，宫墙望数仞。
中有狡童子，我法未迷信。
我心窃欢喜，当能见尧舜。

题友人画

芳草年复年，故人来复去。
送之山外山，至我题诗处。

十一月初九夜北京西站送老母返桂

居京大不易，母子慨然慨。
母才居数月，子已客八载。
春秋谋稻粱，风雪日弗怠。
子壮母渐衰，哪能割养爱。
赁居同一檐，终夕见影背。
计拙两困顿，屋小气幽晦。
壮心日消沉，反哺力不逮。
站台送母归，背影望安在？
寒风吞声歌，消失在人海。

陈显赫（1首）

过青海湖

日下祁连山接天，北风吹浪白云边。
美人今夜入谁梦，海样胸襟抱月眠。

易林人（1首）

题矮树桩挂荔果图

留着残根世贬褒，无辜刑刖旧曾遭。
犹能报答春相顾，羞煞枝头占位高。

陆玉梅（2首）

岳池翠湖

山一环屏水一帘，明明如玉又如盐。
竹篙拨日浮天上，翠色凝云绕塔尖。
龟卧奇峰斜照晚，鸟鸣深树鲤鱼潜。
谁人放钓湖烟里，归去晴光满袖添。

尖山寺

赖有游山意，乘舟过翠湖。
勒碑人不辨，藤蔓鸟相呼。
所见残垣积，何尝野果殊。
此中云邈尔，识得大儒无？

安全东（4首）

江安河畔晚步

晴波遥映绕城流，洒面风来暑气收。
江走白沙滩滚雪，夕阳红上最高楼。

登青城山

青城天下幽，坐在云霞里。
三十六洞天，焉能穷次第。
振衣参玄妙，老聃呼不起。
长啸山谷应，清风洗俗耳。

山中夏日

登顿沿洄自主张，林花一路炫辉煌。
泉争赴约来无处，鸟擅酣歌性不忘。
及顶人家近仙骨，洗心梵磬出云凉。
松梢筛月明窗静，偃寝依稀梦有光。

登凌云寺

我登凌云山，来谒凌云寺。
不见云飞来，春风吹未已。
樟树十余株，直摩青冥底。
大佛近在侧，汹汹人如鲫。
香烟恣缭绕，禅诵闻数里。
真欲绝尘滓，暂时清俗耳。
因之思禅师，千年呼不起。

孟祥荣（2首）

梧州道中

客意逢初夏，欣然向远途。
好山都入眼，微雨渐成无。
不道诗心苦，只惭行旅孤。
此州多乳茗，谁与共提壶。

寄友

数年闲谢屐，一旦解尘封。
拟与轻云去，莫询何处踪。
容颜经岁老，上国正春浓。
天意怜疏阔，江湖或偶逢。

崔德煌（4首）

山溪濯后咏

汇成湍水向天涯，十万青山是老家。
每遇崖巅漂作瀑，更沾云气补成霞。
何曾有恨偏淹月，纵使多情却送花。
只惜如今江海浊，清流不绝助浮槎。

入山寻梅道上

冷怀云气较开迟，却拟孤山会有期。
一股清流泉漱石，两边密叶树交枝。
休官应幸辞前日，骏骨还留到此时。
欲问梅村何处是，偶漂花瓣曲溪知。

过 雁

一字横空过，雁飞还旧家。
故山初解冻，春信正催花。
莫近人村宿，当知客路赊。
念君如念我，同是走天涯。

百里洲看梨花

大楚龙兴地，怀王墓尚青。
明时岂多见，白首我初经。
孤岛囚于水，梨花繁似星。
恰逢酥雨过，诗意最堪听。

李静（1首）

谒宋庆龄故居

红瓦粉墙花正开，一庭春色净无埃。
翠柯不碍风云入，白鸽犹呼宾客来。
壁上流年容我读，房中遗物待谁回。
仰看玉像双眸炯，可是海天望远桅？

沈华维（2首）

癸卯初夏登光雾山

顶上犹清冷，青桐翠出峰。
香炉双独立，栈道半悬空。
雨过云将淡，花开色便浓。
高低皆有态，山不掩真容。

深夜寄语

缘分因诗结，相逢非偶然。
动帘迎片月，驭梦下西川。
心语传云外，情怀到枕边。
夜深仍不寐，辗转忆巴山。

周啸天（2首）

朝天峡

乱石当空累十丸，网箍桩铆冀平安。
人心毕竟思维稳，便到千钧一发间。

访杜甫纪念馆

斯人一敛春秋笔，此地空余笔架山。
既断曹刘难并驾，何妨屈宋作衙官。
极评须到千年后，妄议休凭十首前。
今日故园开甲第，富儿趋鹜共流连。

刘道平（2首）

保温瓶

为人坚守为人忙，也许心中有内伤！
嘴紧更兼生气少，满腔都是热心肠。

打工告别

惜别依依步又停，回头掩袖泣无声。
哽喉一句叮咛语：莫让手机空响铃。

武立胜（2首）

嫁女

愈近佳期情愈伤，几回相对耗灯光。
爹娘无有千钟粟，半夜叮咛作嫁妆。

雨中立汨罗江畔

来谒大夫迹，一思一泫然。
因怀子魂魄，遥对楚云天。
雨下疏而密，腮边淡与咸。
当时汨罗水，已逝百千年。

邓建秋（2首）

赴龙泉驿桃花诗会（二首）

驿程东望锦初裁，一路春风伴我来。
不觉嫣红柔绿里，诗心已作碧桃开。

春风相约到农家，迎面青山细雨斜。
一片诗心寄何处，龙泉驿外对桃花。

葛勇（2首）

邻家餐厅半年三易其主

欲拼全力换杯盘，此事而今竟太难。
半载忍看三易主，几人不感寸心酸。
海枯已少鱼能捕，山竭稍余薇可餐。
想象移交钥匙际，百般滋味两眉攒。

过移民安置点

天朗气清日，驱车乡野娱。
路逢锄禾媪，告我有花庐。
循言过山坳，花气扑衣裾。
月季傍蔷薇，粉白间黄朱。
唯是惜牡丹，憔悴着花疏。
洛阳何灿灿，此地竟区区。
午返过媪家，晤言坐须臾。
知是三峡民，迁徙此间居。
赐田三四亩，忽焉廿载余。
来时尚青丝，今已朽残躯。
祖茔与故宅，早已付荒墟。
因问念乡否，垂头土木如。
正悔发此问，一声长唏嘘。

熊天锡（4首）

秋 柳

青春领跑大河边，燕剪风裁景万千。
两手空空行不得，迄今无语对寒蝉。

寒露有作

觅句重阳后，真珠对郁陶。
寒蛩嗟露重，大雁喜秋高。
趣赏枫林晚，诗裁柳叶刀。
匆匆年月过，谁为润吟毫。

立 冬

偶觉衣衫薄，寒秋客里过。
风前听落木，雨后拍残荷。
人撰丰收曲，我吟生活歌。
诗囊装美梦，应比雪霜多。

初冬即景

林疏风渐北，霜重菊还娇。
血月疑悬帜，陶篱自奏箫。

敲屏开绿码，观海泛红潮。
尘事空回首，芙蓉色已消。

宋善岭（5首）

夏 日

为贪水岸凉，倚柳桥头坐。
与我比悠闲，鸳鸯荷下卧。

夜宿北海

银滩椰树莫相寻，身倦犹宜一榻深。
纵使高温何所惧，海风今夜是知音。

途 中

欣逢九夏正晴和，跨越千山入普陀。
已是退休生活里，佛前岂敢乞求多。

过明仕河恰逢芒种

坐上扁舟游大山，蓦然回首望田间。
古来哪有公平事，人在锄禾我散闲。

记 梦

轻踏烟霞路，欲寻林下人。
开门主持老，入目碧荷新。
喜解心千叠，聊弯月半轮。
醒来唯自问，何日梦成真。

徐晋如（4首）

与秋水夜谈

古调凭谁挟瑟弹，群飞海水迫奇寒。
无心为奏时新曲，信着人间行路难。

题遵义海龙屯

一角金瓯补未完，雄关依旧对连峦。
蛮云如怒天孙老，断魄将招楚调残。
七百年来花变灭，三千世外梦耽槃。
可怜鞭石成何用，孤负多情泪一泫。

夏日和萧白登莲花山韵山座城心小平画像在焉

翠微高处且凭临，不夜城如蜃嘘侵。
几处夷歌惊竹外，一天红雾接松荫。

风前泪是牛山叹，别后诗唯《梁甫吟》。
曾记春残宫粉落，鹃声绝似海潮音。

咏木棉

湘娥之血上枝红，湘水悲流到海东。
湘女燎天持怒炬，湘云遣日落春丛。
昂头岂下昭新志，掉臂应如河岳雄。
不肯攀枝宁堕地，似鸣鼉鼓激丰隆。

张伟超（4首）

长沙开福寺

湘山湘水两相涵，禅意文心共此龛。
紫气千寻压晴翠，碧湖一脉出精蓝。
浩园雅致今何在，名士风流信已参。
南下始惊春又半，飞花约我再行南。

湘潭大杰寺

月色泠泠泉一泓，忽听万壑起涛声。
碑经风雨千重劫，才绝潇湘七子名。
永夜桂香连梦寐，禱丰僧衲答精诚。
同眠羽客人无见，钟板悠悠报五更。

株洲空灵寺

兰若明朝忆我曾，同游清客复山僧。
舟连浩渺空灵岸，殿映苍茫不夜灯。
缭绕盘螭骇犀炬，萌翻雏凤矫溟鹏。
诗题绝壁高难见，江影遥思杜少陵。

北京戒台寺

垂花石径走三公，满地微金上有枫。
小立虬龙山色里，横收燕阙梵声中。
烟深故国楼台异，鼾卧名王头角雄。
莫笑重来真短隔，生涯本自等旋蓬。

燕河（4首）

杨花

燕雀新巢啼树丫，明窗晴日舞杨花。
一生流落春光里，逢着清风即是家。

夜雨

几树槐花香满庭，南窗默坐阅金经。
纷纭旧事杂相忆，夜雨凄凉不忍听。

秋 雁

王风冷冷暗吹芦，何处桃源问有无。
举目云天唯默旅，萧森寒意满江湖。

壬寅新年

去岁艰难事更繁，万家生计锁篱藩。
相逢笑拜新年好，各有悲欢不忍言。

曾俊甫（4首）

过长沙寄意坚兄用黎二樵《忆郭山人》韵

行程一码验风云，又向星沙作客人。
论世须从关卡夜，于君不碍酒场春。
楼台四面余灯火，疫疠三年畏路尘。
行近萧条莫回首，迢迢尚是路边身。

晚间闻鼾戏赠樵哥

小室雷鸣倦不眠，容君饱睡我如煎。
从知世味喧难定，触动人情卧仅蜷。
风雨骤来沙石卷，梦魂方憩虎龙缠。
上苍应赐琅玕枕，相对支床共一天。

午后游长沙市委党校

晚来风日乐清幽，踏过璜宫作短游。
绿地且容吾辈坐，苍生独付圣人忧。
铭心掌故多匡世，慰眼湖山独倚楼。
我欲无言浑不易，论家论党一迟留。

癸卯立春后四日寄慧子杭州

春阴欲雨晓寒生，久坐闲窗记旧盟。
到底梅花看太淡，向来诗句味全清。
天涯念我鸿千里，梦里迎君月一城。
廿四番风吹未晚，待随花信过临平。

杨立新（5首）

枫 叶

身坠泥沙色尚鲜，殷勤拾取作书签。
红尘我亦飘零客，暂替秋风管一年。

清 明

斯山斯水又经过，几度东风吹满坡。
老死能逢春便好，桃花葬我不须多。

沈 园

沈园离泪总沾襟，铁马冰河梦亦深。
消受平生无别物，抗金剑与美人心。

超山梅花

浮世烟尘到此删，归来遗梦总相关。
何时手握梅花印，盖遍江南大小山。

春 柳

春风吹水碧连天，湖底青山湖上烟。
垂柳千条疑挂瀑，一时溅绿到襟前。

傅露（5首）

端阳祭屈子有怀

心怀济世每传诗，笔下美人力不支。
抱石沉吟去多日，从今病国仗谁医。

鸡鸣寺胭脂井

金粉繁华气已凋，尚余枯井记前朝。
深庭花草长如寂，玉树悲歌恨未消。

媚香楼

楼前春水气沉沉，一室琵琶尚有音。
血染桃花歌扇底，当时谁解美人心。

天印山

方山授印得名初，定有仙人在此居。
今我闲来从古迹，为寻灵宝得天书。

玄武湖

未见乘龙起八溟，芙蓉空自舞娉婷。
伤心只有台城柳，遥共钟山一色青。

杨益安（4首）

炭子冲刘少奇故里

故居侵眼际，远道仰丰碑。
绿盛情怀烈，人多敬意随。
山川一夕冷，草木十年悲。
劫后春风暖，相看皆展眉。

绩溪上庄胡适故居

群山遥合古村幽，襟带清溪缓缓流。
寂寂苔痕侵白壁，斑斑故物夺青眸。
九州能重新文化，百载仍寻真自由。
兰蕙门庭留旅足，红尘况味值寻求。

过北京纪晓岚故居阅微草堂

满室氤氲浮墨香，谁怜壁像久清凉。
门厅古色堪追忆，挂绿紫藤摇夕阳。

天津访梁启超故居饮冰室

国恨君恩志未酬，神州暮色正横流。
饮冰室里如椽笔，写尽少年中国愁。

李伟亮（3首）

明长城

戈壁雄浑泉水柔，停车恰在野桥头。
长城已断留残土，犹镇河西百里秋。

赴花城湖途中

山雪遥遥路不颠，连绵秋草望如烟。
一程沙磧一湖水，照见青天白鸟闲。

伊人桥

最是湖风吹面新，丛花夹道隔凡尘。
伊人桥下涟漪碧，芦苇苍苍高过人。

归樵（4首）

再翻已故好友微信

往事空遗微信屏，指尖复划数曾经。
语音未肯轻删去，每次翻开却怕听。

龙山红叶

秋色平分元化功，清修应得道人风。
寺前陶染全真性，幽静闲翻脱俗红。

收拾书柜

再拂尘痕理旧书，橱头柜底失于疏。
贫居也厌无心物，久积静沾颇费除。

无 题

一段相思太惘然，巫峰十二只虚谈。
西风吹断高唐梦，谁替微云解不堪。

滕晓熠（5首）

珀斯海湾公园

光透树丛如抹金，漫将美景镜头寻。
微风阵阵木桥现，芳草茵茵游客临。
仰望长空云有态，静听海面浪无音。
珀斯寂寞公园里，尽是飞鸥绕翠林。

Nannup 镇小雨随感

鸟鸣高树正多情，一字飞翔冒雨行。
黄叶随风翻蝶梦，乌云卷浪浊天明。
人终百载尘埃化，魂落何方神鬼惊。
且惜房车三寸地，开心切莫待来生。

寻 友

光阴转瞬十春秋，花甲人生何所求。
叶岂能黄桑梓梦，霜真可白少年头。

当初相识张家界，今日失联南半球。
借得微频来助我，找回玩伴续风流。

黄昏随感

一生苦短又逢秋，直觉风霜已染头。
海外身疲心绪乱，长空日落目光忧。
不知桂府门何在，许晓兰亭水尚流。
只要健康人快乐，无须计较未封侯。

浪迹天涯二周年有句

前年此日正离家，打点行囊赴海涯。
迎送多情非袋鼠，往来常客是山鸦。
八千里路牛羊数，几十城乡烟火赊。
诗与远方皆斩获，一肩风雨裹尘沙。

陈东彩（5首）

过城步十万古田

穿林涉泽入苍茫，簇簇青苔尺许长。
颇怪手机无信号，不知身已达洪荒。

回雁峰

衡岳南来一土丘，偶因回雁入名流。
更兼千首诗留壁，引得骚人访不休。

过郴州

闲策春风作远游，驱车特地过郴州。
千年不断郴江水，中有词仙无量愁。

郴江边夜饮

两岸霓虹炫入窗，沉吟对酒傍郴江。
词魂千载无寻处，空向清流酌一缸。

过苗寨蓝玉故居

征南逐北虎威扬，跃马从龙敢逞强。
拓土君称唐李靖，谋身自愧汉张良。
四围山色看初暝，几树鸦声噪晚阳。
铁甲迷魂归故里，凌烟阁外有祠堂。

高学文（4首）

寄怀双江口

双江镇里每相违，最忆红霞灿若晖。
襟落榴花风漫舞，莺啼柳线雨轻微。
一篙水涨摇新绿，十顷香融拥翠围。
更有轻舟邀白鹭，清歌携取晚云归。

桃花谷咏桃花

一瓣轻盈落砚边，相思微动寸毫前。
恰如蝶翅初凝粉，不与春风误拂弦。
馥郁每疑仙侣近，多情暗卜此宵圆。
凭谁引月家山外，流照红云下玉渊。

穗城东湖感寄

镜里烟鬟入望疑，一轮明月半湖诗。
或缘柳线移兰桨，拟让花光捧丽辞。
早燕翩跹分梦雨，清风缱绻弄涟漪。
料君收得奚囊满，好向春尖尽展题。

癸卯端月初八夜感作

诗眸豁处水云空，万类荣枯亘古同。
对月且凭箫遣恨，临风好试剑吟虹。
长歌浩荡襟怀在，纵笔汪洋胆气雄。
破八更添新愿景，一行写入此宵中。

关波涛（5首）

南岳大庙

劫火曾经古迹存，辉煌不减祀仪尊。
往来熙攘荣三教，寿涧潺湲绕庙门。

谒南岳忠烈祠

战事艰难志不移，舍身报国几人知。
千秋俎豆青山肃，忍对祠中堕泪碑。

磨镜台

苍松挺立壑幽深，听法同参万籁音。
皆是佛前沙粒子，磨砖故事再难寻。

芙蓉山晚眺

仄径通天扰梦魂，满山风叶卷云根。
此身合在红尘外，四面星辰手可扪。

花 瑶

瑶山叠翠入苍冥，幽鸟谈天不厌听。
溪水泠泠穿寨过，倩谁妙笔写连屏。

胡晖（4首）

踏春见梨花

似雪凝香胜一筹，清郊素蕊落悠悠。
我今树底凌风立，也算人间共白头？

过地下通道见地摊售莲蓬

节序长从此处知，小笏又见碧莲时。
悠悠忽念家门口，并着池中第几枝？

读史有感

开卷元知道不孤，庖丁未必久为厨。
大风歌哭非关楚，太史文章岂与吴。

爱恨人哀羽衣曲，清明谁得上河图。
可怜夜宴韩熙载，醉里三分只若愚。

癸卯小暑后两日登麓山分韵得天

逃禅今又过林泉，忘却城东小暑天。
待看苍松长独立，何凭柔蔓默相牵。
扶杯慷慨倾将尽，隔叶嚶鸣听未全。
我纵胸中有丘壑，此时皆被白云填。

黄波（4首）

乘车

已然无座亦欣欣，站着从窗赏白云。
君若怜吾求不语，既尊小可又尊君。

猫咪球球

萌萌大眼倍愉心，呼噜声音似奏琴。
白晓喵喵留脚步，黄昏抱抱度光阴。
欢欣喂食盆趋满，惭愧归家夜已深。
真爱如何将汝责，猫毛日日满衣襟。

天倪庐

三贵街中藏旧邸，堂成时务绽新芽。
红砖委面爬山虎，碧瓦凝眸蝶恋花。
云映小池鱼与水，榭存大道国和家。
满墙风骨何须饰，庐尚天倪雅不华。

读王强山老师《一生怀抱几曾开》

楚材声望早葱茏，角度新奇自不同。
星月交辉星月朗，圣贤成就圣贤功。
龙头人总清清态，陌上花迎暖暖风。
历尽艰难终未改，一帘飞瀑挂霓虹。

黄去非（4首）

迎春花

凝寒渐散换新花，几处迎春灿似霞。
石罅根深泉汨汨，枝头香溢鸟喳喳。
不同桃杏争颜色，好与诗人共岁华。
一种风流吾最爱，无声无息更无瑕。

癸卯惊蛰与 2022 级古代文学研究生同游

岳阳楼暨文庙并赏楼前梅柳

崇楼登赏趁春晴，文庙瞻依眼倍明。
两字乐忧供咏叹，千年诗礼作权衡。
兴亡继绝青衿责，放柳舒梅厚地情。
似听惊雷苏广野，夕阳归路啭新莺。

晚春与诗友同游东坡赤壁

秣春绿树竞纷披，到得黄州不尽思。
遗爱至今人已去，听箫当日夜何其。
千秋词笔流芬远，万里波涛绕郭移。
客路匆忙深揖别，夕阳回首望崇祠。

营田遥望黄陵庙遗址其地绿树环绕唯余旧屋数间

杜陵诗里认黄陵，韩子遗文亦可征。
祠庙巍峨归想象，市廛杂沓接云旌。
滔滔湘水流难尽，肃肃英灵唤不兴。
遥望遗踪何限感，红墙绿树哪堪凭。

李晓平（2首）

湖南师大毕业四十周年感怀（平水韵）

七七深秋沐暖阳，久违学子返书堂。
云开岳麓鲲鹏志，枫染丹青锦绣章。
教诲恩师音貌在，同窗挚友义情长。
黉门无限金风里，极目潇湘尽栋梁。

嫦娥五号回归（平水韵）

五妹嫦娥闹九天，寒宫迎客喜牛年。
红星旗展凭风舞，火箭云穿任我妍。
惊诧吴刚停砍桂，痴疑玉兔接飞船。
故人相见何相赠？月壤归乡月更圆。

雷凡（4首）

清 明

丽日逢佳节，冈峦七色新。
云生悬石处，路有断肠人。
寸草重披绿，旬年未见亲。
遥思山坳转，高冢对苍旻。

癸卯春日游寒山寺

古刹闻华夏，千年尚未颓。
门前青石径，松下白莲台。
花老随风坠，人繁镇日来。
随行最高处，举目净无埃。

春 行

伞挡桃花雨，寻幽泐水滨。
楼台掩青翠，藤木绽金银。
滩浅石沙卧，天低鸥鹭亲。
岸随田舍转，闲有钓鱼人。

野 菊

故园篱落下，黄白吐幽丛。
霜重青枝弱，盘圆馥气浓。
入诗声有节，对酒绪无穷。
岂惧寒潮急，悠然笑北风。

杨新跃（5首）

看山

到极高时自不群，何般面目亦难分。
圣贤奸恶俱如此，绝顶云还壑底云。

题汝南堂山居

屋后奇峰势欲倾，凭栏脚底白云生。
山人却似聋僧定，任尔松声杂浪声。

访谷碧山张通典疑葬此

草长榛荒乱竹深，折枝作杖入层岑。
民因盛世无樵牧，野放黄花奠古今。
旧事难询村老聩，高台回望暮云阴。
有人埋骨青山下，百载烟尘不可寻。

与宗义、寤堂二兄共倡众筹重印《湖南十家诗选》

老成久恨悉凋残，检点坑灰剩喟叹。
旧岁斑痕怜漫漶，昔年刻画想艰难。
为刊故纸邀同好，且向新时作异端。
一卷悲欢多少事，不知能有几人看。

题汨罗女子桥

垒石为梁倚沅寥，烟波远接洞庭潮。
流声涤虑闲能静，树影生凉暑可消。
四百年来碑已古，北南客去路还遥。
野藤垂水苍龙老，卧看人间换夕朝。

罗伟雄（3首）

癸卯年春节

满台斗彩欲争魁，疫后雄心尚未灰。
为有早安登晚会，且看中国代隆回。
同欢更梦春千里，自罚重谈酒一杯。
坐对喧嚣食鸡肋，岁除寒夜孕惊雷。

兔年三八

柴米沟通久不灵，却于此日忆曾经。
自称金领一三八，偏好红包五二〇。
银子掂来香饽饽，啵儿打去假惺惺。
爱情是件花衣服，卅载重穿尽补丁。

太古里街拍

百媚犹难比阿娇，古街遗梦正春宵。
已将遐想玉条脱，哪不同参金步摇。
公帑尚需全美白，私权当恃内增高。
微言又见风评客，凛凛心情却寂寥。

王璇（3首）

阳康有感兼迎新春

劫后欣余老病身，榻头拂却旧阳尘。
重开烟火添三昧，不觉牢骚淡二分。
小碍虽嗟沧海变，世途难作武陵人。
唯将兔管书春帖，写到安康愿最真。

无 题

谁与相思几许裁，有君共我久低回。
情长不作经年老，只寄梅花笔下开。

夏日监考

东阳上五层，斗室已炎蒸。
扇作嗡嗡转，心当渐渐兢。

趁他忙下笔，容我坐如僧。
偶有偏身处，抬眸欲捕蝇。

王振远（4首）

浏阳河边即兴

柔情似水几时多，浪息风微镜未磨。
鹭影飘来搔一爪，江边笑出小旋涡。

长沙赫石坡下谒抗战文化园

久有馨香愿，来寻赫石坡。
撰题名纵毁，忠烈绩难磨。
土瘞千军骨，风吟百战歌。
苍松长护卫，昂首立嵯峨。

壬寅中秋前夜晓晖兄邀饮东遨兄分韵自拈“云”字

并记新秋巴东之行

问谁秋色许平分，眼底西川势若焚。
路阻当年情缱绻，杯交此夜气氤氲。
屈原祠没千寻水，神女峰留一抹云。
石壁横江波送爽，坐听风起忆湘君。

瑗瑗邀饮洋湖适久旱天雨

雨润波涵水墨图，堤边塔瘦影何孤。
诗堪佐酒翻为客，地不瞒天化作湖。
小径香沉丹桂湿，幽窗梦觉绿荷枯。
天公可也偕人意，漫道秋光有似无。

赵海燕（2首）

桐荫旧友雅集城南

依然圆满碾高庐，风未薄凉灯已疏。
汉隐秦湮终鼎镬，屈嘲阮醉各盲驴。
抹匀一片江山白，渐冷百家灰烬墟。
落鬓流光探手滑，空空到底失真如。

与文贤、读山诸友谒板仓杨氏故居

庐隐修篁似旧时，卅年身换恋花诗。
千言未了千千念，一子难留一一辞。
忍舍娇娆酬累卵，重书浪漫拜朱旗。
我来遇雨倾盆落，乌伞青山对望痴。

谢紫云（2首）

壬寅岁末吟

抗疫清零一曲终，古城寂寂雾蒙蒙。
躺平倏见红羊劫，忧国犹怀陆放翁。
落叶无声怜树老，人间有恨问谁雄。
征鸿此去关山远，万里寒云万里风。

癸卯立春

疫氛忽散得春回，我亦阳康酒一杯。
万里东风无限绿，半湖清影数枝梅。
静观日月争流转，谁泼丹青妙剪裁。
近水云飞真自在，梢头鹊立听花开。

高咏志（5首）

珠穆朗玛

第一峰高绝世孤，苍穹无柱要君扶。
经年跌坐唯披雪，落日磨来作念珠。

江 畔

一片芳流洗汨罗，半江清影起婆娑。
余香犹涨丹芭破，今日倚栏看小荷。

月

入水穿云映小楼，圆如好梦缺如钩。
不拘一格行天地，孤独原来是自由。

岳阳楼记

千里熏风染碧流，一湖明月洗清秋。
先忧后乐人安在，接地浮天剩此楼。

咏玫瑰

小园深处锁芳丛，瓣火成灰蝶梦空。
苔径无尘花有骨，一场寂寞一场红。

曾爱明（3首）

鸚 鵡

一声嗨喽一声亲，逗乐功夫每见新。
会得千家趋奉语，回眸可识本来真？

杜 鹃

曳地裙裾不偶成，怜它翠萼簇红英。
哪堪蝶梦无从逐，一代风华锁大棚。

无 题

万里停云此释然，相看怎得似从前。
未妨荡覆真沧海，只是归来不少年。
雪柳小池风有岸，梅亭细乳雨无边。
疑为花面识人面，飞过帘栊直入肩。

段永松（3首）

赠陈一雷君游十洲

春云出岫百禽飞，满眼园花映翠微。
才向浮邱寻好寺，又来资水洗尘机。
昔时名利南柯梦，今日风情薜荔衣。
更入烟波深处去，且簪芦叶满头归。

拟 归

弱冠即从湘上居，官缘俗累两何如。
清时富贵终无分，白首巾衣尚似初。

赖有孤怀资自适，未辞残俸备家储。
故园苔径荒芜否，明岁归来带雨锄。

赴汨罗经罗子国城故址怀古

凄凉芜野洞庭东，千古荣枯一种同。
汨水流分传说在，罗人事杳史书空。
茫然旧迹归尘土，几许幽思付梦中。
徒想黍离多少恨，年年白鹤望无穷。

冯恩泽（4首）

山居

习静山中远世寰，傍溪小筑听潺湲。
半林残月窥人瘦，一架凉瓜隔院闲。
梦蝶何妨穷处老，盟鸥不待倦时还。
春茶已解清宵酒，晓唱牵吟竹石间。

崖门怀古

豁眸深碧渺无垠，伫立高台觅旧痕。
浴血红如木棉绽，锥心事赖史书论。
可怜少主蕉边梦，枉付元疆海上魂。
独有风涛犹似昔，晨昏不倦拍崖门。

屈原管理区领奖偶成

休从此日言忧喜，万户悬蒲又忌辰。
魂魄千年辉日月，鼓箫八面噪江津。
愧留啸咏廊中壁，更叹湖山客里身。
薪火炎炎终不灭，而今应幸是诗人。

熊治祁先生《湖湘词汇编》出版有寄

瑶篇在手倍堪珍，一脉文风今始陈。
云梦波腾金盏子，潇湘月满画堂春。
须眉捻断嗟慷慨，珠玉锤成何苦辛。
节比箕山吾自愧，只从朱紫辨经纶。

雷歌（2首）

仰贺熊老治祁先生《湖湘词汇编》付梓

湖湘多巨擘，造物化天工。
耄耄沉诗简，殷勤滤史功。
六年劳夙夜，一笔著高风。
我慕先生气，长思立雪崇。

题赤山九臂樟

九臂乘云起，风霜未计年。
千秋留圣德，一树引归烟。
世代传佳话，蠡山少覆船。
渔樵心得得，敬望意拳拳。

田翔玲（4首）

郊外踏春有寄

细雨和风粉蝶忙，纤衣撷取菜花香。
不知柳笛声何处，一曲江南是故乡。

夏日荷池

接天莲叶绿参差，四野偏飞白鹭鸶。
堪笑多情寻胜客，耽吟每每误归时。

过故人庄

燃情仲夏日，独访故人家。
三径香风远，四围烟柳斜。
芰荷分碧水，水木叠清华。
懒看游鱼戏，时闻乱鼓蛙。

天涯倦客邀诗友雅聚未至有寄

欲溯洞庭水，来寻倦客家。
池生春草绿，帘破柳风斜。
明月动乡思，知音惜楝花。
可怜身不已，牵手问孙娃。

王强山（4首）

白鹿原怀古

白鹿原头驻足看，营营名利斗长安。
有情却是灞桥柳，折断明年又可观。

梅溪湖观梅

沿湖奇色早争春，花在枝头最动人。
无语分明成烂漫，含颦清浅比精神。
向怜影瘦芳期短，猛觉香浮劫后新。
赢得江南天地艳，摇红醉眼只当真。

过湘阴望子亭

慈字岩前望子回，回看烽火似成灰。
眼中世味沧桑尽，身后人情孔墨哀。

耿耿心由亭上见，冥冥天在夜分开。

如今我亦他乡客，纵有归程雨又来。

注：湘阴仙坛岭有望子亭，为抗战老兵彭公圣师所建。彭少小离家，开赴抗战前线。其母常立慈字石刻下，翘首盼子。多年后彭归省母，母早弃世矣，遂建此亭。

拙著《一生怀抱几曾开》付梓感赋

劳劳半世读青编，积稿成书意惘然。

得失后人多怅望，是非前史自流传。

文章兴废关今我，道路阻长思昔贤。

不为稻粱谋岁晚，一腔怀抱已经年。

肖志国（3首）

探春

莺拖柳色逗晴烟，燕剪东风水拍天。

但看行人携手处，桃花瓣上探春燃。

夏日访友

红墙绿瓦水天涯，翠竹青荷碧柳家。

借问主人何觅处，田头正卖应时瓜。

春暮访友

白云深处访农家，竹浦风回石径斜。
阳雀惊飞羞问答，山歌抖落一天霞。

张武来（2首）

大雪时节闻疫情解封有感

忽闻关卡不增防，似有梅花透雪香。
已是三年亲绿码，何堪半夜怕红羊。
云开商户新歌里，日照公园小树旁。
晓梦篱边春意涌，临屏唤友欲飞觞。

秦淮河

烟水依然迷幻中，人声拂乱酒旗风。
朱颜不理身边客，小嘴嘟嘟做网红。

张正清（4首）

又登黄鹤楼

千丈琼楼对水街，通衢一洗旧烟霾。
为闻玉笛层层上，又放长江入我怀。

咏 柳

已与东君有约期，鹅黄渐绿不须疑。
晓风残月皆相伴，莫向人间管别离。

纪念蔡锷将军逝世 100 周年

一啸龙泉帝梦倾，何堪鹏翼折东瀛。
资江不尽军魂恨，化作惊涛拍岸声。

台湾慈湖两蒋纪念园

何堪奉厝在慈湖，两代英魂望眼枯。
倘若真心追“国父”，百年史册恐重书。

胡平先（3 首）

癸卯春居饶州

羁旅朱桥卧，疏帘隙日过。
眉舒千柳醒，眼入万花多。
室浅侵芳草，心微弃玉珂。
偏怜沈郎瘦，莫问意如何。

狮子门水清湾

到处竹依松，初疑路不通。
欣从云岫外，渐落翠园中。
库尾开茶圃，溪边起钓篷。
投竿问春水，乐此做姜公。

登四望亭旧址怀王十朋

泽国茫茫指顾间，烟鸿数点影孤寒。
城池漫道千秋盛，山水遥连一境宽。
槐树犹思南宋守，江楼且倚顶层栏。
至今古邑留佳话，且把丹青再展看。

刘国辉（5首）

诗友小聚分韵得“却”字

诗友小聚，以苏轼“长恨此身非我有，何时忘却营营”句

分韵，拈得“却”字

今宵又践诗朋约，小聚城南同一乐。
戏语嗔言尽放形，清规戒律全抛却。
韵沾豪气上云层，字带幽香萦雅阁。
令走花飞兴正浓，窗前未计寒风恶！

候旨亭泥湾里赏荷（步韵崔櫓《莲花》）

淡淡清香袅袅烟，乡村邂逅醉流年。
秆秆碧玉张青伞，曲曲莲歌绕画船。
赏景每为寻景叹，观花常作惜花怜。
出泥不染呈清气，一片冰心未许偏。

坝塘采风行（步杜甫《秋兴八首》之二）

晓发山村日照斜，坝塘风物竞繁华。
林山蹑步如腾雾，花海行车似泛槎。
十里果香留过客，一湾碧水动清笳。
骚人笔下诗情涌，妙句吟来胜看花。

漫兴（步杜甫《秋兴八首》之七）

不叹悲寥不论功，随心随遇住村中。
小楼可沐三秋月，大野能熏四季风。
画绘庭前山水绿，韵吟桥畔夕阳红。
乡情未许诗心老，啸傲何妨半百翁。

遣怀（步杜甫《秋兴八首》之八）

生涯自古路逶迤，涉世如同过岭陂。
吟啸有声随雅趣，钻营无术向高枝。

初心岂让浮名淹，节气焉因序岁移。
万事心诚凭力取，天公或有梦青垂。